





BENTAHA Y DESBENTAHA DI BIBA HUNTO DURANTE NOVIAZGO



WWW.SOLODIPUEBLO.COM



SOLODIPUEBLO@GMAIL.COM

LEY DI MATRIMONIO DI MES SEXO A KEDA EMPATA 10-10 Y A WORDO RECHASA



GRUPO DI PERIODISTA LIGA CU SCUCHA RADIO DI POLIS LO PRESENTA DILANTI HUES


MINISTERIO PUBLICO TA TRATA CASO FLAMINGO DI UN FORMA INAPROPIA INHUSTO Y DISCRIMINATORIO



COMMAND CENTER PA VIGILANCIA CU CAMERA TA UN REALIDAD

Diabierna awor lo tin apertura di un proyecto na Savaneta conoci como e comando center unda lo bira e edificio central pa monitor camera di seguridad.

Esaki ta un paso mas den bon direccion. Riba live video polis por monitor varios area di Aruba. Nan por sigui movecion, auto, hende y busca bek pa wak ken y kico por a sosode. Pabien Husticia, pabien Rocco cu otro bon decision.



PROCEDURA PA BIAHA CU MENOR DI EDAD

- Diamars mainta, director di Inmigracion Aruba (IA), Sr. Andrew Hoo, a duna un conferencia di prensa tocante e procedura pa biaha cu menor di edad. Manera ta conoci, tin diferente rekisito pa biaha cu un menor di edad, pues a delinea esaki mirando cu vakantie di scol ta den porta.

Cada aña, Inmigracion Aruba, ta confronta diferente caso caminda mayornan pa un of otro motibo no tin e documentonan necesario pa biaha cu un menor di edad, p'ese y desde dos aña pasa e formulario di permiso ta obtenibel riba e pagina di Gobierno, esta: www.gobierno.aw, asina comunidad por download esaki facilmente ora ta biaha cu un menor di edad.

Segun director di Inmigracion Aruba, e procedura ta necesario, pasobra Aruba tin cu cumpli cu e reglanan internacional contra traficacion di hende (mensenhandel en mensensmokkel). Tambe, mester proteha e menor di edad di, por ehempel, secuestro.

Cada persona cu ta desea di biaha cu un menor di edad, pa cualkier motibo, sea vakantie, biahe di scol of biahe pa deporte tin cu yena e formulario

“Toestemming reizen met minderjarig kind” (Permiso pa biaha cu un menor). Asina por demostra, ora di pasa control na Inmigracion, cu di berdad tin permiso pa biaha cu e menor di edad.

Una bes cu download e formulario, mester yena esaki completamente. Hunto cu e formulario, mester entrega e siguiente documentonan:

- Copia paspoort di esun cu ta duna permiso (mayor/voogd);
- Copia paspoort di acompañaante;
- Copia paspoort di e menor di edad;
- Si ta aplicabel, copia di permiso valido;
- Si ta aplicabel, copia di gezag register;
- Copia di pasashi di regreso.

Banda di esakinan, ta posibel pa entrega e “geboorte akte” di e menor di edad, sin embargo esaki no ta necesario si cumpli cu e prome rekisitonan menciona.

Mester hiba e formulario y tur otro documento na oficina principal di Inmigracion Aruba pa control y stempel.

Inmigracion Aruba ta haci un apelacion na



cada mayor/persona cu ta desea di biaha cu un menor di edad, pa tene cuenta cu e proceso aki por tuma tempo den e temporada druk di vakantie, pues ta sugeri pa hiba e formulario y tur otro documento, minimo 4 dia prome cu biaha. Di e forma aki, lo evita di haya problema y/of perde vuelo.

Keda pendiente pa ricibi mas informacion den e simannan nos dilanti.

MINISTER THIJSSEN NA RECEPCION DI DESPEDIDA PA SECRETARIO DI ESTADO VAN HUFFELEN



Den Haag – Na Nieuwe Kerk na Den Haag a tuma lugar un recepcion pa tuma despedida di Alexandra van Huffelen como Secretario di Estado pa Asuntonan di Reino y Digitalisacion. Na e ocasion aki Minister Plenipotenciario mr. Ady Thijsen a gradici Alexandra van Huffelen

pa e bunita cooperacion durante di e periodo cu e tabata Secretario di Estado. Tambe Minister Thijsen a gradici Alexandra van Huffelen pa su comprension y su amor y afecto grandi pa e parti Caribense di Reino Hulandes. Sr. Thijsen a desea señora Van Huffelen tur clase di exito den loke

elo bai haci despues di e funcion di Secretario di Estado.

Durante e programa oficial un video a wordo pasa cu palabranan di gratitud y aprecio di mandatarionan di e parti Caribense di Reino, na unda tambe Prome Minister di Aruba mr. Evelyn Wever-Croes tabata tin un mensahe pa Alexandra van Huffelen na unda tambe e prome mandatario di Aruba a gradici Secretario di Estado van Huffelen pa e cooperacion entre Hulanda y Aruba.

Den su discurso Alexandra van Huffelen a mira bek



riba e dos aña y mei cu e tabata den e funcion aki. Ela para keto na su bishitanan na y su intercambionan cu e mandatarionan di e parti Caribense di Reino. Tambe e trabaonan cu ela logra realisa riba e agenda di digitalisacion. E mandatario a bisa su hopi trabao a wordo haci, pero cu lastimamente door

di e caida di e Gabinete Rutte IV, tin proyectonan cu no por e keda finalisa. Finalmente ela bisa di ta spera cu su sucesor sigi riba e mesun caminda pa loke ta e Relacionnan den Reino y Digitalisacion. E recepcion a sigi den un esfera hopi ameno cu musica di Juni Juliet.

LEY DI MATRIMONIO DI MES SEXO A KEDA EMPATA 10-10 Y A WORDO RECHASA

Diaranson merdia pa 2 or, Parlamento di Aruba a trata e concepto di ley presenta pa Miguel Mansur, referente na e matrimonio di mes sexo. Despues di votacion, e resultado a sali 10-10, resultando den un empate y, pa esey, e ley a keda bari di mesa of rechasa. E ley di Miguel Mansur awor ta un parti di historia, pues lo no bolbe bek Parlamento.

Miguel Mansur a reacciona hopi hostina y a haci un yamada na gruponan di LGBT pa nan move nan podernan y pa no laga creytenan religioso impone obstaculo. E parlamentario Shailiny Tromp Lee a bisa den un comunicado cu e tin dilemna keto bay, bisando cu e no kier desapunta ni e religiosonan ni e grupo LGBT. Pa motibo aki, e no a vota, resultando den e resultado final cu e ley

a keda bari di mesa. Tur 21 parlamentario tabata presente, pero solamente 20 a vota y Tromp Lee a abstene di vota.

Pa loke ta trata e matrimonio di mes sexo, e unico decicion cu mester warda ta esun di Corte di Casacion, cual lo wordo emiti dia 12 di juli 2024. Loke e corte aki dicta, mester wordo ehecuta. E tardamento di duna un



sentencia no ta normal pa Corte di Casacion, pasobra ya desde 24 di december nan decision tabata

practicamente cla. Cu a bin un tardamento, ta hopi stranjo.

Minister Dangui Oduber

MINISTERIO DI TURISMO Y SALUD PUBLICO TA CONTENTO CU E PROGRESO DI DIGITALISACION DI E ARUBA HEALTH APP.

Minister di Turismo y Salud Publico sr. Dangui Oduber ta contento con e progreso di digitalisacion di e Aruba Health Application ta canando. Un bunita proyecto unda pronto lo digitalisa henter e sector di cuido medico haciendo uzo di tecnologia y innovacion via e Aruba Health App

Setar hunto cu Ministerio Salud Publico y AZV ta trahando duro ariba e proyecto pa asina brinda un miho servicio na nos aseguradonan. Cu e avanse di e proyecto, pronto aseguradonan por bay experiencia un cambio grandi den e manera cu ta haci cita na nan dokternan di cas via e plataforma di Aruba Health Application.

Den cuadro di mehora calidad y servicio di cuido na Aruba e plataforma di "Aruba Health App" lo bira un pa traha cita via MiDokterDiCas, tambe por ricibi receta prescribi via MiRemedi y

alabes haya otro informacionnan importante di e pashent su historia medico. E innovacion di e plataforma aki ta permiti e aseguradonan pa yega na nan informacion medico 24 ora pa dia cu ta haci e proceso mas rapido.

Minister Dangui Oduber a pone e vision y conhuntamente cu Setar y AZV a logra introduci un plataforma inovativo pa Aruba unda e pashent ta central y mas acceso y control di nan salud. Segun e mandatario esaki ta un "era nobo" pa asina digitalisa henter e sector di cuido medico, cu un resultado pa sigui mehora tur e servicicionan y e calidad di cuido pa tur dokter di cas por traha na un manera mas eficiente, transparente y mas rapido y asina tambe e comunidad por ta mas informa y sinti nan mes den control di nan salud y calidad di bida.

Minister Dangui Oduber ta gradici



tur e partnersnan cuta trahando incansablemente pa pronto por lansa y introduci e plataforma di

Aruba Health App na e pueblo di Aruba.



Noticia di Corte

GRUPO DI PERIODISTA LIGA CU SCUCHA RADIO DI POLIS LO PRESENTA DILANTI HUES

Manera a publica luna pasa, un ora pa otro e periodistanan liga cu caso ex agente Vos lo mester presenta den Corte. A haya informacion cu otro siman e periodistan lo mester presenta den Corte di Husticia pa e caso penal cu Ministerio Publico a cuminsa contra nan relaciona cu scuchamento di radio di Polis via e ex agente Vos.

SOLO DI PUEBLO por a compronde cu e caso lo ta Dialuna awor 24 Juni 2024, caminda e 5 sospechosonan: "Speed" Andrade, Koolman, y Giel, lo mester presenta.

CASO PENAL

Luna pasa interrogacionnan a tuma lugar y tin indicacion cu a base di declaracionnan, lo por tin mas sospechoso. Ta asina cu Ministerio

Publico no kier bisa nada riba e caso aki te otro siman Dialuna ora di tratamiento di e caso.

Na December 2023, durante tratamiento di e caso penal contra e ex agente Vos, Fiscal a muestra cu desde 2018, tres di e radionan tabata na Vos como Polis di bario. Investigacion a muestra cu Vos tabata suministra informacion na Giel y Andrade. Asina a haci investigacion na cas di Vos y a haya tres laptop instala riba 3 radio riba canal 1, cu ta e canal general di Polis. Tabata usa e programa Zelo pa asina manda informacion na cierto media. Ta asina cu 2 di e laptops a wordo desactiva di distancia pa dañá investigacion. A logra habri un laptop caminda a haya 9572 informacionnan di Polis manda pa cierto media. A haya un cu carchi conecta na 24 ora.

E sentencia di Vos a wordo apela door di Ministerio Publico, pasobra no ta di acuerdo cu e decision di Hues. Ta asina cu Fiscal a exige 36 luna di prison (3 aña) di cual 8 luna ta condicional cu un tempo di prueba di 3 aña. Fiscal a exige tambe cu pa 5 aña, Vos no por eherce e trabao di Polis.

Hues a pospone e caso pa 45 minuut y despues a dicta sentencia. Hues ta haya Vos culpabel di algun di e acusacionnan. Hues a condena Vos na 16 luna di prison, di cual 8 luna ta condicional cu un tempo di prueba di 3 aña. Hues a bisa cu e ta prohibi Vos di traha como Polis pa un periodo di 3 aña. E decision aki a haci cu e dia ey mes Vos a haya su libertad. Ministerio Publico for di un principio a bisa cu tin periodistanan sospechoso den e caso Vos y awor esaki ta sali na cla.

MINISTER ENDY CROES A ELABORA RIBA E TRABOUNAN ANDANDO NA VELD DI MADUSHI STARS NA SAN NICOLAS



Recientemente, Minister Endy Croes a bishita e veld di Madushi Stars pa mira e progreso di e trabounan cu ta andando. Manera ta conoci, algun luna pasa a baha e luznan bieu pa aloca e luznan led ultramoderno di e marca Phillips. E luznan LED ta bon protegi contra saltpeter y ta "marine coated" pa asina nan por wanta hopi aña. Tambe a laga traha

bracket completamente nobo. Siman pasa a instala e luznan, cual ta midi un averahe di 500 lux cu ta cuadra cu e standardnan internacional. Ademá di esaki, lo verf ful e veld.

Despues cu finalisa e trabounan lo haci apertura oficial di e veld. "Por a nota cu e famianan den bisindario, esnan cu ta atende cu e veld y nos



amigo Sr. Remigio Kock ta hopi contento cu e proyecto aki", Minister Endy Croes a expresa. Finalmente, e mandatario di Deporte a indica cu tin varios proyecto cu ser ehecuta caba pa deporte en general di Aruba y varios proyecto cu ainda ta den proceso. Cu disciplina, dedicacion y determinacion ta logra.



Otmar Oduber

MINISTERIO PUBLICO TA TRATA CASO FLAMINGO DI UN FORMA INAPROPIA INHUSTO Y DISCRIMINATORIO

Oduber na e momentonan aki tin ya casi 4 aña y mey wardando riba e proceso di investigacion. A duras cu 8 luna pa interrogacion di testigonan cuminsa y ora e mester a cuminsa, lamentablemente, un di e testigonan principal a fayece. Ta trata aki di un polis local cu tabata hefe di Bureau Criminele Inteligentie (BCI) cu ta esun cu a traha tur e rapportnan (7) contra Otmar Oduber, aparentemente na 2019, ora e tabata minister ainda. E informacion aki a sali na cla na 2022 ora cu Oduber a wordo deteni, manda KIA y kier a prolonga su detencion, pero huez no a mira motibo pa e prolongacion.

Es decir, e testigo principal, cu a traha e 7 rapportnan cu informacion basa riba falsificacion y mentira no lo por declara mas. Ministerio Publico mes, despues di a realisa un investigacion for di 2019 te na 2022, a laga tur e 7 rapportnan aki di BCI cay. Cu esaki, loke tabata e base di caso Flamingo no a bay door.

Un otro inhusticia menciona pa Otmar ta cu siman pasa Ministerio Publico a manda un carta pa Hues Comisario cu ta atendiendo cu e testigonan, caminda ta pidi pa mantene e identidad di e miembro di RST secreto; un Hulandes Europeo na Hulanda, cu a traha un rapport completamente falso (TCI). Motibo di esaki ta pa proteha su identidad.

Pregunta cu Otmar ta haci ta dicon Ministerio Publico no a pidi e mesun trato pa e otro dos Arubianonan Hulandes cu tambe a wordo pidi pa testigua den e caso. Un di nan ta miembro di Cuerpo Policial y e otro ta miembro di Landsrecherche di Aruba.

Riba e rapport falso (TCI), Oduber a indica cu esaki tabata contene hasta falsificacion na momento cu a traha e rapport y ademas, contenido di e rapport ta totalmente falso. “E ta un rapport cu a wordo traha pa bisa cu Otmar Oduber a otorga e terno na Hyatt Place pasobra ta hendenan cu tabata financia su campaña. Otmar Oduber no tabata minister dia cu e tereno aki a wordo duna of cumpra na 2015. Otmar Oduber a bira minister na final di 2017. E tereno aki no ta un erfpacht, e ta un eigendom. Kiermen facilmente por a haya e informacion pa bo haya sa cu loke bo ta skirbiendo contra mi ta falso”.


Tambe a bisa cu Oduber lo a otorga permiso di hotel pa e grupo aki, pero na ningun momento e tabata minister di Salud Publico pa otorga permiso di hotel. Tambe a wordo bisa cu e tabatin bentaha pasobra den campaña e tabata tene su reunionnan den e ballroom di e hotel por nada. E hotel a caba di wordo construi na aña 2020, e ultimo eleccion cu Otmar a

participa ta na 2017.

Un otro inhusticia menciona ta cu ley a wordo cambia y empeora caminda cu e persona cu ta wordo acusa, Otmar Oduber den e caso aki, no por ta presente ora ta interroga personanan cu e mes ta busca como testigo. Cu e cambio di ley recien, abogado so por tey y si e persona no tin abogado, e no por sucha testigonan.

Mientras tanto, Landsrecherche si tin e oportunidad cu ora nan ta interrogando un persona, a base di loke nan contesta, nan por sigui puntra mas cos. Cu e cambio aki, ta dificil pa un abogado (cu no conoce e procedura den e caso aki con funcionamiento den gobierno) sigui puntra of pa bisa si e testigo a contesta algo cu no ta berdad of no ta cuadra. Esaki kiermen cu e acusado ta wordo perhudica como ciudadano.

Como ultimo punto, Otmar a indica cu caso Flamingo na Hulanda no lo por ta andando manera e ta awe. Hamas y nunca un persona lo mester a warda 4 aña y mey pa un caso cuminsa, warda 8 pa 10 luna pa interrogacionnan, e proceso aki na Hulanda no ta tarda mas cu 2 siman. Esaki ta algo inhusto y no por ta posibel cu ta mira discriminacion aki den nos sistema hudicial.



Concluyendo, Otmar Oduber a expresa cu tendiendo e testigonan te na e momentonan aki, por bisa cu politica ta meti diki diki den Ministerio Publico na Aruba. “Instruccionnan cu ta wordo duna pa ken si y ken no entrega keho contra nan.

Uza contactonan directo di politica cu Ministerio Publico, opdrachten directo na PG cu a caba di bay. Materialnan di Ministerio Publico ta wordo uza pa bay persecui hende riba opdracht di politica. Aki mi no ta papia unicamente di Otmar Oduber, mi ta papia di directornan, hefenan di departamento, hendenan cu na final di dia a resulta cu no tin nada contra nan, pero e ora DRH di gobierno ta uza material y informacion ricibi na un forma ‘incorrecto’ pa purba persecui e hendenan aki pa wak con ainda nan por scapa cara pa kitanan”.

Clasificados




SOLODIPUEBLO@GMAIL.COM
CEL. 585 9500





Ministro di Husticia y Asunto Social ta anuncia cu entrante **21 juni 2024** segun Ley di Molester, durante 30 dia lo tin oportunidad pa un y tur tuma conocimiento na Departamento di Legislacion y Asunto Huridico, **Schotlandstraat 53** di un peticion di permiso cu a ser haci pa un instalacion di gas di **1x 130 lbs** na **Ponton 2, Lok 3**. Den e periodo aki tur hende por expresa por escrito nan desacuerdo cu dunamento di e permiso menciona. Esaki mester ta dirigi na Ministro di Husticia y Asunto Social mediante director di Departamento di Legislacion y Asunto Huridico, Schotlandstraat 53.

Parlamentario Ricky Hoek (MEP):

TRIPARTIET OVERLEG NA HULANDA CU VARIOS ACUERDO DI COOPERACION ENTRE ARUBA, CORSOU Y SINT MAARTEN

Den Haag a sirbi como e centro di un reunion tripartiet importante entre e comisionnan parlamentario di Aruba, Corsou y Sint Maarten. E reunion aki, dirigi pa señor F. Brownbill, Presidente di e Comision di Relacion di Reino y Parlamentario di Corsou, tabatin como meta pa discuti varios tema di importancia comparti y yega na compromiso concreto. Ta bon pa menciona cu e aña aki, Corsou ta na turno pa guia e reunion Tripartiet. Parlamentario di Fraccion di MEP, Ricky Hoek, a bay Hulanda pa asina participa di e reunionnan aki. E ta comparti un resumen di e puntonan principal cu a wordo discuti y e acuerdonan cu a tuma luga.

'Geschillenregeling'

Un di e puntonan principal tabata e 'Geschillenregeling'. E delegacionnan a bay di acuerdo cu e ante proyecto presenta pa Aruba. E delegacion di Aruba lo manda un version final na e otro delegacionnan, esta Corsou y Sint Maarten den e siman di 17 juni 2024. Cada parlamento tin te fin di juni 2024 pa duna nan opinion. Si nan ta di acuerdo, Aruba lo presenta e concepto di ley formalmente pa tratamiento, Hoek a señala.

Trafico Aereo entre e islanan

Un otro tema importante tabata promove e trafico aereo entre e islanan na prijsnan accesibel. E prijsnan halto y e limitacion den conexion ta punto di preocupacion. E gobiernonan lo traha hunto cu partnernan local pa busca solucion, parlamentario Hoek a duna di conoce.

Deficit Democratico

E delegacionnan a enfatisa riba

e importancia cu e gobiernonan mester duna informacion na nan parlamentonan tocante e procesonan di e leynan di Reino den consenso (consensus-rijkswetten). E acuerdonan ya caba a wordo estableci durante e reunion Interparlamentario Koninkrijks Overleggen (IPKO) anterior. Cada Parlamento lo mester acorda cu nan respectivo gobierno con y ki ora ta comparti e informacion pa garantisa e rekisito di consenso.

Reorganizacion di e sistema di Impuesto

A discuti tambe e transicion di impuesto directo pa impuesto indirecto. E tema aki a wordo discuti suficientemente pa awor, Hoek a indica.

Combatimento di Pobreza

Riba e tema aki tambe a discuti y keda cera temporalmente. E parlamentonan lo sigui monitor e tema aki. Hoek a indica cu hopi dato interesante a bin dilanti y riba esaki e lo elabora den un otro articulo.

Cuido di Salud

E delegacionnan a intercambia experiencianan tocante cuidado di salud mental (GGZ) y cuidado di hende grandi. A indica problemanan di salud mental creciente entre hubentud, falta di experto y facilidadnan, y presion riba fondo di pension pa motibo di 'vergrijzing'. E delegacionnan a acorda pa mantene e temanan aki riba e agenda y stimula e ministronan responsabel pa duna suficiente atencion.

Enseñansa

Pa loke ta e tema di enseñansa, studiantenan y ex-studiantenan



di e parti Caribense di Reino ta topa diferente obstaculo na Hulanda, manera problema di deuda y limitacion di vivienda. E delegacionnan a acorda cu cada pais mester sigui busca alternativanan den ley y reglamentonan di e sistema fiscal pa crea incentivos cu ta promove oportunidadnan pa e studiantenan bin e islanan bek como tambe haci e paisnan di origen mas atractivo pa nan regreso. Entre otro a papia riba posibel garantianan laboral, descuentonan den e debenan di estudio, segun Ricky Hoek a splica.

Informacion tocante Rijkswet

Banda di esaki tabatin un presentacion tecnico tocante Rijkswet y e implicacionnan legal tocante proteccion di dato personal. Esaki tabata organiza pa empleadonan di Direccion di Ley y Asuntonan Legal di Ministerio di Asuntonan General y Ministerio di Gobernacion, Planificacion di Corsou.

Fondo di Reino pa Cambio Climatico

Ricky Hoek a laga sa cu porfin a discuti e necesidad pa un Fondo di Reino pa cambio climatico. E delegacionnan lo traha hunto pa e fondo disponibel optimalmente y desaroya strategianan. Durante e proximo IPKO na Aruba lo organiza un presentacion tecnico di expertonan. Finalmente, mester bisa cu e reunion tripartiet a subraya importancia di cooperacion y responsabilidad comparti den e enfrentamento di desafionan comun. E acuerdonan cu a tuma ta marca un paso dilanti den fortalecimiento di loke ta uni Aruba, Corsou y Sint Maarten y ta duna speransa pa cambio positivo den futuro cercano, asina Parlamentario Hoek a finalisa bisando.

Clasificados










SOLODIPUEBLO@GMAIL.COM

CEL. 585 9500



Prome Minister Evelyn Wever-Croes: Ban proteha nos muchanan

REALIDAD TRISTO: 99% DI ABUSO SEXUAL DI MUCHA, E ABUSADO TA FAMIA OF CONOCI!

Desde inicio di Gabinete Wever-Croes na 2017, Gobierno di Aruba ta haciendo tur posibel pa atende cu e problema delicado di abuso y abuso sexual di menor. Pa trece mas conscientisacion ainda den pueblo, Gobierno a decreta luna di april como Luna Nacional Contra Abuso di Mucha. Riba prevencion, ehecucion y conscientisacion, Gobierno hunto cu Comision Nacional di Abuso di Menor, organisacionnan y fundacionnan gubernamental y no gubernamental, ya a tuma diferente accion pa yuda preveni y combati e crimen grave aki contra nos muchanan.

Sinembargo, e ta un berdad hopi tristo cu e problematica aki ta cuminsa hopi cerca di cas mes, di esnan hopi cerca di un mucha. For di un estudio haci, ta alarmante e cifra y informacionnan obteni di casonan di abuso di mucha. 99% di casonan na unda muchanan ta wordo abusa sexualmente, ta wordo abusa door di personanan cu e victima conoce. E por ta un amigo di cas, of amiga of amigo di mama y tata, pareha nobo, door di omo, door di welo, of padrastro. Esakinan ta personanan cu ta cerca di e muchanan y kendenan e muchanan ta confia. Personanan kendenan a mayornan a confia pa laga nan yiunan den nan cuido.

Esaki ta un indicacion fuerte cu e problema mas serio no ta ley, Gobierno of hues. E problema mas serio ta den famia. Eynan nos mester enfoca. Eynan Gobierno no por drenta facilmente. Esey ta responsabilidad di cada famia, di cada persona cerca di e mucha cu e mucha ta confia. Por cambia tur ley pero si den famia e abuso sigui te hasta wordo permiti y tolera, nos ta sigui faya nos muchanan. Y ta hunto so nos lo preveni y combati e crimen aki contra nos menornan inocente.

“Nos mester confronta e berdad aki, aunke cu e ta incomodo y delicado.



Abuso hopi biaha ta socode door di personanan di confiansa, personanan cu mester ta esunnan cu mester brinda proteccion na nos muchanan. Nos por cuminsa pa evita 99% di e casonan aki door di wak miho cu kende nos ta laga nos yiunan y reconoce señalnan den e mucha of den esnan cu ta wak pa e mucha. Door

di ta consciente, acepta loke ta pasando, y door di accionnan preventivo, nos por traha pa un futuro caminda cada mucha ta crece den un ambiente liber for di e garan di abuso. Nos muchanan merece miho”, Prome Minister Evelyn Wever-Croes a expresa.

ASOCIACION DI CUERPO CONSULAR DI ARUBA TA ANUNCIA NAN DIRECTIVA NOBO

Oranjestad, Aruba- Asociacion di Cuerpo Consular di Aruba ta anuncia nan directiva nobo pa aña 2024-2027.

E eleccion di e directiva nobo a conta cu participacion di consulnan miembro di ACCA, durante un reunion general a scohe e siguiente miembronan como Directiva:

Presidente: Consul di Republica Dominicana- Luis Eludis Perez

Vice President: Consul di Colombia -Gustavo Serrano

Secretaria: Consul di Costa Rica- Cecilia Maria Arendsz

Tesorero: Consul di India-Prakash Gupta

Miembro di Directiva Consul di Francia- Christian Mongellaz

Miembro di Directiva Consul di Mexico- Natasha d' Arnault

Miembro di Directiva Consul di Uruguay- Roly



Sint Jago

Miembro di Directiva Consul di Ecuador- Magali Guzman Meza

Miembro di Directiva Consul di Filipinas- Ami Henriquez Mendez

Board Advisor Solangel Dinmohamed Lacle

E directiva nobo ta asumi cu hopi entusiasmo y compromiso e tarea di fortalece e lasonan entre consuladonan na Aruba y sigui traha hunto cu Gobierno di Aruba pa asinan brinda tur ciudadano cu nan ta representa riba nos isla derecho y oportunidad.

MINISTER DI CULTURA XIOMARA MADURO A PRESENCIA E PROYECTO ESCOLAR “FIESTA DI SAN JUAN” NA CAS TAN TIN



Dialuna mainta Minister Maduro tabata na Cas Tan Tin pa por a presencia e proyecto escolar di Departamento di Cultura “Fiesta di San Juan - Dera Gay,” na unda nos muchanan ta ricibi informacion tocante nos fiesta tradicional di cosecha riba Dia di San Juan, dia 24 di juni proximo.

Departamento di Cultura den colaboracion cu Cas Tan Tin y Brandweer Aruba a organisa un programa

educativo pa muchanan di Scol Preparatorio y Basico di 1ste te cu 3de klas. Un total di 32 scol y como 3 mil mucha ta haya oportunidad pa experiencia y wordo educa riba e Dia di San Juan y e baile di Dera Gay den e periodo di 11 pa 20 di juni.

Den e sabana di Cas Tan Tin, Minister Maduro di Cultura por a presencia e splicacion di parti di e elenco di Departamento di Cultura lidera pa John Freddy Montoya,

cu a duna splicacion di e motibo di e celebracion di Dia di San Juan y a mustra tur elemento di e fiesta cu ta importante pa e muchanan por reconoce den e celebracion. A sigui canto di canticanan popular di tempo di cosecha, demostracion di e baile di San Juan y tambe tabata tin un competencia di e grito di Gay, cu ta eventonan cu ta forma parti di e celebracion di Dia di San Juan.

Di parti di Brandweer Aruba, Sr. Francis Toussaint a splica e hobennan riba e tradicion di cende candela riba Dia di San Juan y a conseha pa evita di cende candela, ya cu esaki por ta peligroso pa hende, bestia y nos medio ambiente. A duna tips con mester trata si acaso un



candela wordo cendi pa evita peligro.

Na final di e evento, Minister Maduro a parti un certificado na cada mucha cu a participa den e demostracion di baile y e wega di grito di gay. Despues tur scol a haya un recorrido den e cas monumental Cas Tan Tin pa asina nan por mira con tabata biba antes na Aruba.

Minister Maduro di Cultura ta gradici tur instancia

cu a haci e eventonan aki posibel, Departamento di Cultura, Museo Cas Tan Tin, Departamento di Bombero, e agrupacion musical y tambe e grupo di hoben di Formacion Social, kendenan a yuda coordina y guia e muchanan durante nan yegada cu bus, e presentacion escolar, e recorrido den Museo Cas Tan Tin y salida cu bus bek pa nan respectivo scolnan. Masha danki. Cultura bo tin cu bib'e y cu bo participacion bo ta engrandec'e.



Minister Glenbert Croes: Despues di reunion historico cu REPSOL: CU REALISACION DI E PROYECTO DI REPSOL NOS TA CREANDO UN FUTURO NOBO



- Minister di Energia Glenbert Croes hunto cu director di RDA/FMSA, director di WEB y director di Utilities Aruba NV, a reuni cu e compania di energia Repsol basa na Madrid. Durante e reunion a delibera riba e diferente oportunidadnan cu tin, den cuadro di transicion energetico, proyectonan di

energia renobabel y riba e tema di re-activacion di e patio di tankinan di RDA.

Minister Croes a califica e reunion aki como uno historico pa Aruba pasobra "cu realisacion di e proyectonan aki nos ta creando e futuro nobo cu nos futuro generacion tin derecho riba dje".

Minister Croes a indica cu e oportunidadnan aki, lo yuda pais Aruba cu un actividad economico impresionante pero totalmente diferente na e tempo di refinaria. E ta un aspecto cu ta duna un impulso economico diferente na loke turismo tabata, a representa y lo keda representa pa desaroyo economico di pais. Hunto cu e realisacion di e Aruba Hydrogen Valley, Gobierno di Aruba ta tumando un rumbo energetico cu lo bay bira un pilar economico di gran importancia, mirando cu e lo genera prosperidad economico pa e comunidad



di Aruba en general.

"Repsol ta un di e empresanan di energia mas grandi na mundo, y nan interes expresa den Aruba pa por realisa e diferente proyectonan aki, ta un gran bendicion, y mas cu tur cos un paso historico. E representantenan di Repsol pronto lo ta na

Aruba, na unda nos lo tin e oportunidad di presenta na e diferente proyectonan. Mi ta inmensamente orguyoso cu nos a haya e oportunidad aki, pasobra cu realisacion di e proyectonan aki nos ta creando e futuro nobo, cu nos futuro generacion tin derecho riba dje", Minister Croes a termina.

STUDIANTENAN DEN PROCESO PA HAYA ARUBALENING MESTER HABRI CUENTA DI STUDIANTE NA BANCO LOCAL

Oranjestad, 19 di juni 2024

Departamento di Enseñansa Aruba (DEA), seccion Studiefaciliteiten, ta recorda studiantenan cu preparacion pa esnan cu lo sigui studia ta inclui varios rekisito importante cu tin cu wordo regla mas pronto cu ta posibel. Cuenta di banco local

Un di e rekisitonan ta habri un cuenta di estudiante na un di nos banconan local (si e estudiante no tin esaki ainda).

Ta asina cu na momento cu e estudiante ta bay haya su Arubalening, esaki ta wordo pasa riba un cuenta di banco local na number di e estudiante. E cuenta por ta hunto cu un mayor pero e mester ta primeramente na number di e estudiante.

Den caso cu ta bay studia den exterior, mester pidi banco pa haci esaki un

"Non Resident Student Account". Lo por haci esaki mesora ya ta evita di tin cu bolbe pa haci cambio.

Upload den Arubalening Portal
Manera cu e cuenta di banco ta cla, e estudiante tin cu upload un prueba di e cuenta aki den su Arubalening Portal. Riba e prueba nos mester por wak e number di banco, number di e estudiante y tambe e number di cuenta.

Tin banco ta pidi un carta di prueba (verklaring) cu e estudiante lo bay haya Arubalening pa asina nan por habri e cuenta di banco pa e estudiante. E estudiante por pidi e verklaring aki via e number di WhatsApp di Arubalening 594 4140 (solamente pa WhatsApp). Ora di manda mensahe pidiendo e carta (verklaring) pa banco, no lubida di pone bo datonan

personal (number completo y fecha di nacemento) pa asina DEA por traha e verklaring.

E preparacionnan cu tin cu haci prome cu sali pa exterior como estudiante ta hopi, pero si cuminsa cu nan trempa por keda cla cu tur cos na tempo.

WWW.EA.AW, WWW.
PAPIAMENTO.AW, +297 528 3400,
STADIONWEG 37, ORANJESTAD,
ARUBA

Mas informacion

Pa cualkier pregunta relaciona cu Arubalening por manda un email na arubalening@ea.aw of un whatsapp na 594-4140.

Pa mas informacion por acudi na nos website ww.ea.aw y busca Arubalening (Portal) na letter A den e alfabet menu. Tambe ta sugeri



studiantenan pa sigui Departamento di Enseñansa Aruba riba Facebook y/of Instagram @EducationAruba pa keda na altura di tur informacion. Personal di DEA y seccion Studiefaciliteiten ta desea tur estudiante hopi exito.



HOROSCOP

20 JUNI 2024

Feliz y productivo diahuebs. Awe Solo di Pueblo ta presenta bo horoscop pa dia 20 di juni 2024.

Aries
Sea alerta, un relacion bieu ta purbando di descentralisa bo. A traves di famia bo por logra haya algun placa extra. Purba di concentra mas den trabao, bo ta distraui. Drumi mas ora, bo tin mester di dje. Number di suerte: 91, 93, 4.

Tauro
Bo ta radiante y p'esey bo ta regala un dosis di cariño na bo famianan. Lubida di bon bida, no gasta tanto. Bo proyectonan profesional lo mester warda. Ocasion pa

sosega y logra haya e balans psicologico. Number di suerte: 67, 22, 1.

Geminis
Dia perfecto pa kibra curason unda cu ta. Consulta cu un experto prome cu bo riesga bo placa. Trabao logra ta orguyese bo. Bo ta anda un poco desordena den bo interior, pero no ta grave. Number di suerte: 52, 46, 1.

Cancer
Bo kier y laga bo mes wordo stima. Dificultad financiero ta wordo provoca pa un sancion. Tuma bo tempo na trabao of lo bo comete error. Bo wesonan ta dolor, tuma baño relajante. Number di

suerte: 66, 52, 2.

Leo
Sea mas solcito cu bo pareha, e lo beneficia bo. Bo economia lo recompone y ta stabilisa. Dia laboral yena di idea y proyecto nobo. Evita e estado di tension. Number di suerte: 33, 99, 9.

Virgo
Ta cumbini bo disfruta mas cu bo amigonan. Mehora bo calidad di bida, danki n'e negoshi nobo ey. Bo trabao ta reconoci pa bo hefenan. Cuidao cu e deportistenan di riesgo, tuma precaucion. Number di suerte: 69, 42, 5.

Lidia
E persona ey cu bo kier, lo bolbe. Pensa den e benefician a largo plaso y no toca bo cuenta. Bo a logra entre tur e ambiente laboral envidiabel. Dolor di lomba; cuidao cu e posturanan. Number di suerte: 22, 31, 8.

Scorpio
Dia feliz y sereno riba e tereno sentimental. E situacion economico di un amigo ta afecta esun di bo. E compromiso laboral nobo aki lo reporta beneficio. Ningun motibo di preocupacion pa bo salud. Number di suerte: 73, 69, 3.

Sagitario
Bo relacion ta funciona door di e pasenshi cu bo pareha tin. Mal momento pa core riesgo economico. Prudencia pano tin conflicto cu bo hefenan. Cansa, purba di sosega bo curpa. Number di suerte: 99, 71, 2.

Capricornio

Ereuntyo Romano
E satisfactorio. E asuntunan economico ta marcha di manera satisfactorio. Reivindica bo derechonan laboral pa haci bo respeta. Tendencia na somatisa e problemanan, percura calma bo mes. Number di suerte: 17, 75, 8.

Acuario
E malentendidonan amoroso lo bay preocupa bo. No pensa mas y permiti e capricho ey. Na trabao, pone pia abao y no laga ningun cabuya los. Realisa e descanso mereci y desea ey. Number di suerte: 88, 95, 9.

Piscis
Si bo tin keho den bo relacion, expone nan. Yudae amigo ruina ey, lo bo sinti bo mes bon. Siña defende esunnan cu ta envidia bo laboralmente. Purba di elimina e stress ey. Number di suerte: 67, 83, 3.

Partido MEP:
RODYMAR GEERMAN TA FELICITA MINISTER ROCCO TJON CU E APERTURA DI E OPERATION COMMAND CENTER
Determinacion y esfuersonan haci pa trece mas seguridad riba nos isla



ORANJESTAD - Rodymar Geerman, candidato hoben di Partido MEP, ta felicita Minister Rocco Tjon y Cuerpo Policial di Aruba cu e apertura di e Operation Command Center na Savaneta. "Determinacion y esfuersonan haci pa trece mas seguridad riba nos isla ta conduci na logronan cu lo garantiza mas tranquilidad no solamente di nos bishitantenan sino tambe pa cada ciudadano di nos pais", Rodymar a expresa.

Manera ya Minister Rocco

Tjon a duna di conoce, e Operation Command Center di Aruba ta esun mas moderno di e region, cu monitoreo di 258 camera instala den centro di San Nicolas, den area di hotel y pronto den centro di Oranjestad y asina brinda un miho seguridad riba nos isla.

E camaranan ta traha cu un software hopi moderno basa riba inteligencia artificial, unda por reconoce un number di auto, e color di e auto y color di paña



di un persona. E sistema aki di "real time" lo asisti Cuerpo Policial y demas departamento hudicial no solamente pa resolve crimenan cometi, pero tambe preveni y reduci esaki.

Cuerpo Policial di Aruba su tarea primordial ta pa garantiza seguridad y Gobierno lo sigui inverti den tecnologia pa asina sigui preveni y combati criminalidad na Aruba.

Rosario Bibo diabierna 21 di juni na Alto Vista

Diabierna awo, 21 di juni, lo tin otro Rosario Bibo na kapel di Alto Vista pa 7 or y mey di anochi. Tur hoben cu a haci examen ultimo ta invita pa bin gradici Señor pa nan logro. Esnan cu no a logra pasa nan examen cu exito tambe ta invita pa pidi Spirito Santo forsa pa nan sigui persevera y lucha pa logra nan meta den futuro.

Manera custumber lo resa pa tur nos grandinan sea na cas of den cas di cuido, pa tur enfermo, pa tur esnan cu ta traha pa yuda nan famia, pa tur hoben y pa nos comunidad en general. Comision organizado ta invita un y tur pa asisti na otro Rosario Bibo diabierna awo, 21 di juni, na kapel di Alto Vista.



Publica serka nos anuncio di fayecimento di bo ser kerl.
Nos tin 2 pakete pa ofrece;

Pakete 1: Anuncio di fayecimento te dia cu e defunto ser dera
Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto ser dera
Gradicimento y invitashon pa misa pa 3 dia
Na Canal 22 1x prome cu Noticiero 22 Afl 400,00

Pa mas informashon por tuma contacto cu oficina na
585-9500 of na 741-4554


BENTAHA Y DESBENTAHA DI BIBA HUNTO DURANTE NOVIAZGO



Tuma e decision pa biba hunto durante cu nan ta namora ta un paso importante den cualke relacion. Mientras cu e decision aki por fortalece e relacion y duna un bista realista di bida den pareha, e por presenta retonan tambe. Aki nos ta explora tanto e puntonan pa como contra di tuma e paso grandi aki.

BENTAHA

- Conocemento profundo di otro: Bida hunto ta permiti conoce e pareha na un nivel mas profundo i autentico. Actividadnan diario, rutinanan y mañanan ta bira evidente, dunando un comprension completo di personalidad y habitonan di cada un.
- Fortalecimiento di e vinculo: Comparti un cas por fortalece e relacion, ya cu e ta fomenta cooperacion, compromiso i solucion di problema hunto. Enfrentando retonan hunto por fortalece e vinculo y aumenta confiansa mutuo.
- Prueba di compatibilidad: Bida hunto prome cu matrimonio por sirbi como un "prueba" pa evalua compatibilidad. Ta un oportunidad pa descubri si ambos ta capaz di convivi den harmonia y maneha diferencianan sin conflicto importante.
- Economia di recurso:



Comparti gastonan di cas, manera huur, recibo y cuminda, por alivia e carga financiero pa tur dos. Esaki por permiti un miho planificacion financiero y spaar pa futuro proyecto hunto.

- Miho comunicacion: E comunion ta fomenta comunicacion constante. Den e mesun espacio, ta mas facil pa discuti problemanan y tuma decisionnan hunto, cu por mehora e dinamico di e relacion.

DESBENTAHA

- Perdida di espacio personal: Comparti un cas por nifica perdida di privacidad

y espacio personal. E necesidad pa adapta constantemente na e presencia di e otro por genera tension y stress, specialmente si un di nan dos ta balora su independencia hopi.

- Rutina y monotonia: Convivencia por introduci un rutina cu, si no maneha adecuadamente, por bira monotono. E falta di novedad y e predecibilidad diario por baha e emocion y e romance cu ta caracteriza e etapa di noviazgo.
- Conflicto domestico: De-



Separacion di propiedad, haya luga nobo pa biba y maneha e emocionnan envolvi por ta dificil pa soporta.

Conclusion

Bida hunto durante noviazgo ta un decision cu no mester tuma lihe. Ta importante pa tur dos banda discuti nan expectativanan y preocupacionnan prome cu nan tuma e paso aki. Evalua e puntonan pro y contra por yuda tuma un decision informa cu ta beneficia ambos y promove un relacion saludabel y feliz. Na final di dia, cada pareha ta unico, y loke ta funciona pa un por no ta adecua pa otro.

E yabi ta den comunicacion habri i e deseo pa traha hunto pa construi un bida comun den harmonia.

sacuerdo riba e tareanan di cas, custumber y estilo di bida por bin dilanti hopi biaha. E conflictonan por intensifica si no maneha nan na un manera efectivo, poniendo e harmonia di e relacion na peligro.


- Compromiso prematuro: Pa algun pareha, biba hunto por crea un sentimiento di compromiso prematuro. Esaki por ta problematico si un di e miembronan di e pareha no ta cla pa un compromiso asina serio, cu por genera inseguridad y conflicto.
- Impacto riba e relacion si e termina: Si e relacion no

ta funciona i e pareha ta dicide di separa, e logistica di deshaci un bida comparti por ta complica y doloroso.

Clasificados

SOLODIPUEBLO@GMAIL.COM
CEL. 585 9500

Departamento di Enseñansa Aruba cu ultimo encuentro di Alfabetisacion na Papiamento



Recientemente a tuma luga e ultimo dia di estudio pa cabesante- y maestronan di klas 1 di scol basico.

DEA den consulta cu e directivanan di scol a inicia cu un trayecto di preparacion pa cabesante- y nan maestronan di klas 1 di scol basico na november 2023. E promer sesion informativo a cuminsa dia 17 di november 2023 na unda a comparti informacion, a conecta cu otro y a crea diferente Comunidad Profesional di Siñamento (CPS). En total a forma ocho CPS na unda cada CPS lo enfoca riba un of mas topico pa profundisa nan mes aden. Cada CPS por a enfoca riba diferente area specifico cu ta interesa e grupo nucleo di e CPS.

E cabesante- y maestro- nan di klas 1 a bin hunto

dia 19 di januari, 16 di februari, 27 di maart, 19 di april y 31 di mei 2024, pa hunto prepara debidamente pa e introduccion di siña lesa y skirbi na Papiamento den klas 1 na augustus 2024. Cada dia di estudio a tuma luga bou guia di Departamento di Enseñansa Aruba (DEA) conhuntamente cu Centro di Desaroyo Profesional Continuo (CDPC) di Instituto Pedagogico Arubano (IPA).

Cada reunion a cuminsa cu un momento general unda a comparti informacion general pa esnan presente, sigui pa tayer- nan informativo pa e maestronan di klas 1 y pa finalisa e dia a sigui traha riba e topico di e Comunidad Profesional di Siñamento (CPS). Cabesantenan a participa na tayernan dirigi specifica-




mente pa nan, na unda a comparti informacion y sosten pa asina apoya nan den nan papel pa sostene y motiva e maestro- nan y e team di nan scol. Cada CPS a presenta nan producto final na nan coleganan y Directiva di scol durante e ultimo dia di estudio riba 31 di mei. Di e manera aki e gruponan colectivo a yuda sostene otro den e preparacion di e implementacion di e mane- ho nobo di idioma na unda ta siña lesa y skirbi na Papiamento. E gruponan a profundisa nan mes den e materia na unda algun grupo a presenta nan observacion nan, otro a presenta material cu nan a adapta, y otro a traha material completamente nobo. Na e manera aki e gruponan a acopla bunita na otro. Mester menciona cu du- rante e dia aki Minister di Enseñansa, sr. Endy Croes tambe tawata presente pa presencia e productonan final y a te hasta haya su mes ines- peradamente ta forma parti di un di e presenta- cionnan.
















DEA ta hopi agradecido

pa e sosten ricibi di tur e cabesante- y maestronan y Directiva di e scolnan y alabes DEA kier a yama Minister di Enseñansa danki pa su presencia du- rante e mainta aki. Pa mas informacion rela- ciona cu Enseñansa na

Aruba por acudi na nos website www.ea.aw.

Tambe por sigui nos den social media via nos face- book y instagram pages @ educationaruba pa keda na altura di tur in- formacion.



<div></div> <div>Paardenbaaistraat 10, Oranjestad, Aruba Tel.: (297) 525 - 7555</div> <div>www.lottoaruba.com</div> <div>Resultado : Sorteo 19 Juni 2024 Merdia</div>		
<div><div></div><div>Sorteo # 4301</div><div>2118</div><div>8472</div><div>5085</div><div></div><div>FP</div><div></div><div>Sorteo # 4301</div><div>9653</div><div></div><div>FP</div><div></div><div>Sorteo # 2357</div><div>7126</div><div></div><div>Sorteo # 4301</div><div>2073</div><div>Sagitario</div><div></div><div>Sorteo # 1175</div><div>082</div><div></div><div>X2</div></div>	<div><div></div><div>Sorteo #</div><div>0 x Jackpot</div><div>0 x Match 4+</div><div>0 x Match 4</div><div>0 x Afl. 12,00</div></div> <div><div>Joker</div><div>Letter</div><div>Proximo Jackpot</div><div>850.000,-</div></div>	
<div><div></div><div>Sorteo #</div><div>0 x Jackpot</div><div>0 x Match 4</div><div>0 x Afl. 8,00</div></div> <div><div>Proximo Jackpot</div><div>96.000,-</div></div>		
<div><div></div><div>Sorteo #</div><div>0 x Jackpot</div><div>0 x match 4</div><div>0 x Afl. 500,00</div><div>0 x Afl. 50,00</div><div>0 x Afl. 15,00</div></div> <div><div>Mega Ball</div><div>Proximo Jackpot</div><div>290.000,-</div></div>		
<div><div></div><div>Afl. 390.000,-</div></div>		
<div><div></div><div>Sorteo #</div></div>		<div></div>

Dia Mundial pa Combati Desertificacion y Secura extremo 2024:

Nos Tera, un Legado pa Futuro

ORANJESTAD - Pa conmemora e di 30 Convenio pa combati Desertificacion y Secura, Nacionnan (UN) a oficialisa cu e observacion di Dia Mundial di Desertificacion y Secura extremo (Desertification & Drought Day) ta riba dia 17 di juni. Nacionnan Uni ta pone enfasis riba e importancia di solidaridad internacional pa atende cu e retonan di secura extremo y degradacion di suela, pues desertificacion. E tema pa 2024 ta "Nos Tera, un Legado pa Futuro". 'E tema aki ta reconoce e rol crucial cu e tera ta hunga den nos bida. For di apoya e ecosistemanan y biodiversidad te na sostiene nos economia y comunidad. E meta ta pa encurasha transformacion pa un mundo cu suelanan mas sano y di biodiversidad halto. Directie Natuur en Milieu (DNM) a bin ta tuma nota

di nos suela y e temporada di secura ta uno extremo. Plantamento of mantene matanan na bida ta un reto. Tambe, ora tin yobida e awacero ta core y e tera no ta haya tur oportunidad pa absorba e awa. Esaki ta pone cu e suelo no tin suficiente humedad/awa pa provee matanan ora planta. Kico ta desertificacion? E ta e proceso di degradacion di tera den zonanan arido, semi-arido y medio humedo pa seco. E ta un menasa serio pa medio ambiente y desaroyo humano causando impacto negativo riba mas di 3 mil miyon di hende. Secura ta un otro menasa grandi cu ta contribui na degradacion di suelo (desertificacion). Cambio climatico ta aumenta e frecuencia y severidad di secura, poniendo presion riba recursonan natural cu ta depende di tera y awa. E comunicado aki ta haci

un yamada pa traha hunto pa combati e degradacion di suela y secura. Door di cooperacion y asistencia mutuo, nos por promove manehonan sostenibel di tera, aumenta capacidad di adaptacion na e cambio climatico, y sigura e futuro pa hende. Aruba mester traha na combati e degradacion di suela esta desertificacion. Si, ta berdad cu Aruba no ta clasifica como un area di desierto, pero nos isla ta exponi si na efectonan di e desertificacion debi na su clima semi-arido y awacero inconsistente. Nos por atende cu e retonan aki door di implementa manehonan manera:

- Maneha eficazmente e recurso awa pa conserva esaki.
- Proteccion y restauracion di vegetacion pa reduci erosion di tera.
- Promove practican-

an di agricultura sostenibel cu ta conserva salud di tera.

- Stimula desaroyo di suelo cu material organico. Trahando hunto pa un futuro mas berde

Dia di Desertificacion y Secura ta un recordatorio importante di e necesidad pa traha hunto pa un futuro mas berde y un biodiversidad saludabel. A traves di accion colectivo y solidari-

dad internacional, nos por mitiga e efectonan di e degradacion di suela y secura extremo y crea un mundo mas sostenibel pa futuro generacion. Pa mas informacion tocante Dia Mundial di Desertificacion y Secura, por fabor bishita e website di Nacionnan Uni: <https://www.un.org/en/observances/desertification-day>.



	7			6				9
6			5				8	
		4				7		
	3				6			
2				5				8
			4				1	
		3				4		
	2				7			3
1				8			2	

8			3					
3					5			
		9	1		4			
	4			8		7		
6								2
		8		2			3	
			7		9	6		
			2					5
					8			4



EDADISMO Y ABUSO DI ADULTO

MAYOR -1 TABATA UN ÉXITO

Na Caminda pa Seminario-2 Diasabra Awo



Diasabra, 15 di juni 2024, a tuma luga e seminario “Conscientisacion y Prevencion – Edadismo y Abuso di Adulto Mayor” na ATIA Building, Dakota di 1or pa 5or atardi. Tabata tin 4 orador, esta mr. dr. Alida Marval (Hurista), mr. Gabri de Hoogd (Abogado), sra. Clarisca Velasquez (KPA) y dr. Carlos Vallejo (Neuro-Ciruhano).

Sra. Alida Marval a toca e tema di “Kico ta Abuso contra Adulto Mayor – Algo tocante e situacion na Aruba”. E a trece 3 forma di abuso: 1. Psicologicamente (palabra, zundra, pest, etc.), Edadismo (trata e Adulto Mayor cu humiacion), Negligencia (descuido, no duna cuminda y/of remedi na tempo, ni

limpieza corporal, etc.), 2. Maltrato fisico (pushamento, dalmento, etc.) y Abuso sexual (no respeta su privacidad, etc.). E abusonan aki ta causa hopi problema den hogarnan, na cas, casnan y institucionnan di cuidu, etc. Hopi biaha e abuso ta continua pasobra e victima(nan) tin miedo di esun cu ta cuid’e y ta depende di dje. Prioridad ta pa bin cu registracion di abuso y crea cifra pa maneho.

Sr. Gabri Hoogd a trata e topico di “Financiële Uitbuiting”, explotacion financiero, di Adulto Mayor. Algun ehempel di señalnan ta: desaparicion di placa y otro cosnan di balor, retiro di sumanan for di cuenta bancario sin splicacion/autorizacion, aumento di

debe, peticion inespera pa cambio di testament, intimidacion e Adulto Mayor si e no kier coopera, etc. Den e Cidigo Civil, Burgerlijk Wetboek, tin diferente articulo cu ta protege e Adulto Mayor, den su dependencia y estado mental afecta, contra actonan abusivo door di cuidadornan y otro personanan den su ambiente cu ta atende cu su pertenencianan y asuntonan financiero.

Sr. De Hoogd a repasa diferente jurisprudencia na Aruba y Hulanda.

Sra. Clarisca Velasquez a relata tocante con Polis di Bario, ultimo añanan, a haña su atencion debido pa por atende cu tur e barionan.

KPA tin basta barioregisseur na Playa, Noord, Paradera, Sta. Cruz, Pos Chikito, Savaneta y San Nicolas, pero ainda falta mas pa por optimalisa e servicio.

E equipo ta atende tambe cu Adul-tonan Mayor y ta desaroyando un sistema pa registra y controla mas efectivo. Creando mas informacion relata na e Adulto Mayor ta un prioridad.

Dr. Carlos Vallejo a duna un splicacion di su practica medico na Aruba y Colombia, unda e ta atende cu diferente caso cu por y a beneficia door di atende cu aumento di likido rond di e cerebro di personanan cu deficiencia motorico.

Den cierto casonan ta necesario pa un pashent haci un MRI pa averigua si ta posibel pa haci e tipo di operacion aki.

E seguro social lo mester ta mas accesibel pa adulto mayor den e casonan di diagnostico na tempo.



No por ta asina cu e asegurado, Adulto Mayor ta paga su contribucion y No ta ricibi sierto servicinan necesario a cambio.

E publico presente a apoya e presentacionnan di e 4 presentadornan y a aprecia e informacion cu nan a ricibi.

A pidi pa bin mas di e tipo di seminarionan aki.

Un danki ta bai na tur oradornan cu a haci un tremendo trabou.

y Na e publico cu tabata activo, haciendo diferente pregunta.

E próximo Seminario lo tuma luga Diasabra awo día 22 di juni y lo ta completamente na Papiamentu cu splicacion aki aja pa esnan di habla Ingles.



Ley Matrimonio di Mesun Sexo: Parlamentario Shailiny Tromp-Lee ta duna un splicacion amplio riba su decision pa abstene di votacion



Awe un biaha mas lo tin votacion pa e ley cu ta trata matrimonio di mesun sexo. Dia 8 di mei 2024 e ley a keda trata y 10 parlamentario a vota pro, 10 parlamentario a vota contra y mi persona a abstene di vota. Mirando cu ta trata un ley di iniciativa di parlamentarionan mes (Miguel Mansur, Misha Raymond, Marisol Tromp y Aquanette Gunn), contrario na votacion usual ora ta trata concepto di ley presenta pa Gobierno, e conteo menciona aki riba ta conduci cu un biaha mas mester realisa e ronda di votacion, door cu no tin un mayoria na favor di e ley. Awe, si tur parlamentario vota mescos cu dia 8 di mei 2024 e ley lo keda desaproba.

Proceso den parlamento
Mirando tur conmocion cu ta keda crea y e falta di cono-
cimiento di e proceso den Parlamento of sistema par-

lamentario, mi a tuma nota di hopi critica basa riba conclusionnan incorrecto. Contrario na pensamiento di algun hende, abstencion ta algo masha comun den sala di Parlamento. Como parlamentario bo por abstene di vota pa un mocion, amienda of un ley. Esaki mas cu claro por tin diferente motibo manera motibo politico, tin duda of preocupacion cu ainda cu no a keda atendi, flohera y falta di responsabilidad (bin reunion, firma lista di presencia y ta bay cas) of no por tuma un decision of ta mira solucion pa e tematica cu e ley ta trata.

Diferente momentonan cu a abstene

Durante aña 2024 so nos por mira con durante di diferente tratamiento di ley, parlamentarionan ta abstene y no ta vota pro of contra un ley. Mi ta bay duna ehempel di algun di nan:

- Ley di RWZI y rioolnetwerk, 30 di mei 2024, colega Rycond Santos do Nascimento a firma lista di presencia, tabata presente den sala ora di votacion y a abstene di vota;

- Ley encunto Wetboek van Strafvordering, 12 di maart 2024, colega Misha Raymond a firma lista di presencia, tabata presente den sala ora di votacion y a abstene di vota;

- Presupuesto di TPEF 2024, 27 februari 2024, colega Rycond Santos do Nascimento a firma lista di presencia y a abstene di vota;

- Presupuesto DOW 2024, 7 februari 2024, colega Rycond Santos do Nascimento y Mike Eman a firma lista di presencia y a abstene di vota;

Si nos wak atras y keda na e topico di matrimonio di mesun sexo y loke a bin na su lugar durante di e discusion al respecto na aña 2016, esta geregistreerd partnerschap, nos por mira lo siguiente:

Amienda geregistreerd partnerschap, 8 di september 2016, parlamentarionan Guilfred Besaril, Dangui Oduber, Xiomara Maduro y Ady Thijsen a firma lista di presencia y a abstene di vota. Dus ora politiconan enfatisa cu un parlamentar-
io mester vota pro of contra y no por abstene, mi ta haya cu ta hunga cu emocion di pueblo y ta informandonan incorrectamente.

Mi decision di abstene

Mi persona, awe 19 di juni 2024, net 6 siman despues di 8 di mei, un biaha mas lo abstene di vota. Mi decision pa abstene ta paso mi ta den un dilemma cual mi no por sali afo. E informacion y peticion cu mi ta ricibi for di e pueblo ta uno mixto. Como cu nos ta biba den un democracia mi ta scoge pa comparti mi opinion y mi ta spera cu tin espacio pa esaki. Mi ta papiando aki como un hende cu ta bisa enfaticamente cu e tin un dilemma tanto interno como externo. Ta trata di un asunto asina importante y delicado cu e ta haci'e dificil pa tuma un decision. Mi ta sigura pueblo henter cu mi a lesa, mi a papia, mi a consulta y principalmente mi a resa pero ainda mi no

por tuma un decision cu ami mes por ta tranquil cune y por tin paz interno. Pesey mes mi ta pidi respet pa mi decision pa abstene y no participa na votacion.

Despues di dia 8 di mei 2024 mi a haya hopi reaccion, critica destructivo y tambe palabra di sosten. Mi kier enfatisa cu ami ta respeta opinion di tur hende y a dicidi tambe mirando con delicado e topico aki ta, y con emocional hendenan ta bira, pa no hiba e discusion riba medionan social of den prensa. Pero sinceramente mi ta puntra mi mes cu si enberdad ta necesario y aceptabel pa bay riba nivelnan asina baho pa ataca un persona cu for di profundi-

dad di su curason ta bisando bo cu e tin un dilemma y no por tuma un decision.

Conclusion

Mi kier termina informando pueblo cu mescos cu ora a trata e ley dia 8 di mei 2024, henter dia mi tabata na pia di trabou, esaki ta e caso awe atrobe. Mas cu mi no lo participa na e ronda di votacion. E motibo pakico boso no lo wak mi sinta den sala ta pasobra e regla di custumber ta cu pa abstene bo mester sali di sala. Tin dos ocasion e aña aki cu colega nan a desvia di e regla, pero ami lo sigui mantene mi mes na e regla te ora cu nos dicidi cu lo introduci un proceso nobo di votacion.

ORACION DI DIA



Un dia fructifero colma cu e bendicion y
forsa di ariba y yena cu Spirito Santo

"Pasobra esun cu Dios a manda ta papia palabra di Dios; pasobra Dios ta dun'E Spirito Santo na abundancia." Huan 3, 34

Dios a manda Hesus pa siña cada un di nos con nos mester biba. Cu nos mester kere y obedece Dios. Kere

den Esun cu Dios a manda, acept'E y respet'E. Ta berdad cu nos ta biba riba e mundo aki pero nos no ta pertenece na e mundo aki. Nada di e mundo aki por duna nos e felicidad

berdadero. Solo Dios por haci e hende feliz. P'esey laga nos haci nos maximo esfuerso pa agrada Dios y biba di acuerdo cu Su santo boluntad.

Ban pidi Dios pa prepara nos pa ricibi Esun cu E lo manda for di shelo pa nos mescos cu E la baha riba Hesus riba dia di Su bautismo cu ta e

Spirito Santo di Dios. E ta Esun cu ta yuda nos y siña nos loke ta e berdad pa nos keda pertenece na Su reino y nos por ta e testimonio cu ta confirma cu

Dios semper ta e berdad. Door di esey nos ta haya un bida nobo hunto cu Hesus cu a resucita canando riba e caminda di bida eterno. E unico caminda, berdad y bida cu ta hiba nos na salvacion.

Oracion: Tata Celestial duna nos e gracia pa acepta, kere y respeta Bo Palabra. Laga Bo Spirito Santo por baha riba nos y duna nos e uncion cu semper Bo tin warda pa nos. Amen.

Clasificados

SOLODIPUEBLO@GMAIL.COM
CEL. 585 9500

SOLO Di Pueblo

Inscripcion pa Prisma pa aña escolar venidero 2024 - 2025




Con pa inscribi pa Prisma? Por aplica via website www.skoa.aw pa asina inscribi completamente online. Bay riba e website y click ariba inschrijven y despues scoge pa Prisma. Di eynan mes- ter sigui e intruccionnan ariba e website pa completa e aplicacion di cada mucha. Si tin duda con pa inscribi via nos website por pasa libremente na nos oficina di SKOA situa na Copernicusstraat 11, Aruba durante orario di oficina entre 8am - 12pm y 2pm - 4pm.

Por haya mas informacion ariba nos website www.skoa.aw y tambe por yama nos directo na (+297) 523 1800 durante orario di oficina.

Oranjestad, Aruba: SKOA su inscripcion ta habri pa e programa di “Schakelklas Prisma” pa aña escolar venidero di 2024 - 2025. Mi yiu tin cu bay Prisma? Prisma ta un programa di 1 aña cu ta enfoca ariba e idioma di Hulandes pa asina prepara muchanan cu no ta papia Hulandes mas miho posibel pa nan integra den

scol regular exitosamente, caminda Hulandes ta e lenguahe primario den e curriculum. E programa di Prisma ta evalua alabes e desaroyo academico a base di cada mucha su prestacion di si- ñamento y tambe nan desa- royo social - emocional cu ta importante pa nan crece- miento en general.



**OLIVE TREE'S
PRE-PAID
FUNERAL PLAN**

PAY AS YOU CAN

Piedraplat ☎ 582 0000
Sanicolaas ☎ 584 8888 | 5820000
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411
www.olivetreefuneralhome.com



SETAR ta participa fayecimento di nos colega:

Stanley Pourrier

Acto di entierro ta tuma luga diamars 25 di juni 2024 di 9.00 am pa 11.00 am na Aurora Funeral Home.
Oportunidad pa condolencia ta dialuna 24 di juni 2024 di 7.00 pm pa 9.00 pm.

Gerencia, Staf y Personal di SETAR N.V. ta extende palabra di condolencia na famia y conocirnan di nos colega Stanley.

Cu Stanley sosega na paz.



Maravillas de la Fe

Bo ta sufri di un malesa nan cu no no por cura ? Manera artrosis, Alzheimer, demencia, depresión, diabetes osteoporosis, párkinson, insomnio, dolor di barica, weso migren dolo di barica, dolo di wesu, lomba, ect? Bo ta bebe remedi i bo no ta cura? Bo ta victima di bruheria? comunica na MARAVILLAS DE LA FE na 748 56 71

Bo no tin suerte? bo placa no ta jega? Bo ta cumpra number i bo no ta gana? Bo ta bai casino i perde tur bo placa? Invidia, mala suerte? comunika na 748 56 71

Bo tin problema di amor? Bo pareha ta gaña bo? Fracaso, soledat, angustia. comunika na

Comunica na 748 56 71

 **748 56 71**

